

四庫全書

史部

# 欽定四庫全書

史部

平定律噶爾方畧正編卷二十二至二十四

詳校官監察御史臣孫家賢

通政使司副使臣莫瞻菴覆勘

總校官進士臣朱鈐

校對官編修臣周厚轅

謄錄監生臣汪瀾

欽定四庫全書

平定準噶爾方略正編卷二十二

乾隆二十年冬十一月乙酉

諭定西將軍策楞進剿竊據伊犁宰桑都噶爾等事

宜

策楞奏言十月二十六日副都統阿敏道解察

哈爾護軍校鄂齊爾圖等至軍營臣將現在伊

犁情形詳細詢問據稱我隨將軍駐劄伊犁八

月二十二日喀爾喀貝勒旺親扎卜領兵撤回  
為賊人搶掠回報將軍將軍等派侍衛扎克素  
等帶領兵丁同宰桑都噶爾偵探不意都噶爾  
引我等至宰桑克什木駐劄地方突將我等交  
得木齊布塔齊看守是日宰桑巴蘇泰與都噶  
爾克什木等率衆赴伊犁肆行搶掠旋至濟爾  
哈朗空格斯地方圍住官兵將軍等俱行自盡  
副將軍薩喇爾為宰桑錫克錫爾格所獲我等

於九月十九日夜乘間脫出聞阿睦爾撒納於  
九月內前赴伊犁坐牀令各鄂拓克豫備羊酒  
不知現在何處伊犁從賊之人係克什木巴蘇  
泰敦多克曼集等數人又得木齊布塔齊云宰  
桑巴蘇泰與阿睦爾撒納相好是以今我等看  
守並非出於本心再來時至托多克地方聞知  
阿巴噶斯哈丹搶掠臺站歸時為諾爾布林沁  
之兵所敗諾爾布林沁將游牧內移阿巴噶斯

等恐其復行勦殺親向哈丹鄂拓克借兵安設  
卡倫防守游牧我等潛行六日始出阿巴噶斯  
等游牧等語奏入

上諭軍機大臣曰據策楞奏鄂齊爾圖等所供都噶  
爾克什木敦多克曼集巴蘇泰等竊據伊犁肆行  
擾害情罪可惡策楞帶兵進勦務期斬獲倘就擒  
時即派幹員解送來京治罪妻孥悉行誅戮其喀  
爾喀王貝勒等隨將軍等駐劄伊犁者尚多策楞

訪問查出即明白傳旨曉諭伊等猝遇寇賊兵少  
受困朕心甚為軫念今大兵已抵伊犁即令伊等  
各回游牧休息以示體卹至所奏剿滅阿巴噶斯  
後即帶兵速赴伊犁辦理固屬奮往但不可不慎  
重仍遵前旨偵探阿逆如已據伊犁候噶爾藏多  
爾濟等到時會合前進方為妥協

命審擬遲悞軍糧之遊擊王國士等

上諭軍機大臣曰軍行糧餉甚屬緊要遊擊王國士

乃派委解糧之員半月止行數臺任意玩悞著革職治罪道員王守坤訛傳官兵等在烏爾圖布拉克地方守候糧餉以致解送遲悞著一併交與和起等審明定擬具奏

丙戌

命永貴等辦理糧餉

上諭軍機大臣曰王守坤現因遲悞軍糧交和起等質訊永貴在北路軍營辦理糧餉尚屬勉著加



恩賞給按察使銜署理臨洮道速往巴里坤辦理糧餉其烏里雅蘇台糧運事務著蘇章阿溫福辦理

諭叅贊大臣富德督辦西路臺站事宜

上諭軍機大臣曰前已降旨授富德為叅贊大臣駐劄額林哈畢爾噶協同扎拉豐阿辦事富德前在北路管理臺站甚屬妥協今西路具奏事件失之遲緩想因臺站新設未諳馳遞而新附之厄魯特

等或未能奮往効力富德應加意督率並酌賞銀  
兩茶葉以示鼓勵

丁亥

訓諭定西將軍策楞

上諭軍機大臣曰從前平定伊犁時投誠之台吉宰  
桑等班第等若能因其求見開誠曉諭有應鼓勵  
者奏聞加恩則新附之人傾心悅服遇事無不陳  
告不但地方情形人情向背皆可周知即伊等可

信與否亦得以灼見聞班第在彼惟辦理陳奏事  
件不與伊等接見又與鄂容安意見不睦以致為  
賊所困今策楞前往當以前事為鑒遇沿途投誠  
厄魯特等即與接見庶可以通其情而資其力將  
軍大臣惟在集思廣益寧輯邊疆方為無負任使  
若陳奏事件自有司員承辦即稍有遲悞亦屬可  
原至在事大臣等俱係朕信用之人理應和衷共  
濟屏除一切意見為國家効力宣猷設彼此互生

猜疑不特於公事無益寧不貽笑於厄魯特耶即如現往軍營之厄爾錫音哈薩克錫喇尼瑪等雖係新降之人既同在一處亦應虛衷商酌使伊等各抒所見以期集事策楞前在伊犁目擊班第等情形此時務宜遵旨悉力妥辦毋蹈前轍再前遣尼瑪駐額林哈畢爾噶查辦臺站今伊抵巴里坤領兵前進奮往可嘉寄到佩用荷包及鼻烟壺二件著傳旨頒賜尼瑪不必駐劄額林哈畢爾噶即

同策楞領兵前進其所派管理臺站事務策楞於所知台吉或噶爾藏多爾濟屬下宰桑內選派一二員隨同富德管理

諭甘肅巡撫吳達善等派兵運糧事宜

上諭軍機大臣曰軍營糧餉關係緊要理應加意辦理何以遊擊王國士派委運糧半月僅行六臺必係僅派綠旗兵丁運送以致如此玩悞和起等辦理甚屬錯繆現在滿洲及索倫察哈爾兵丁調集

巴里坤若交伊等運送不但行走迅速且於運糧之便直抵軍營一舉兩得況達什達瓦人衆此際已應至巴里坤附近地方伊等善於行走又熟悉路徑將伊等選派數百名酌給糧石與滿洲索倫等兵丁同運更為有益此皆和起等應行籌辦之事乃並未籌及所司何事著傳諭吳達善和起豆斌等遵旨悉心辦理

命潼商道薩瀚等赴肅州等處差委

上諭大學士曰現在西路軍營糧餉馬駝需員經理  
該督撫等現經委派各員外著再派潼商道薩瀚  
涼莊道來朝前赴肅州及安西哈密等處聽候該  
督等差委分辨至巴里坤軍營委用將弁亦尚需  
人著派副將滿祿際泰叅將青海邁斯漢遊擊對  
齊富明阿前赴巴里坤聽候和起豆斌等委派軍  
務

命選派達什達瓦部落人衆從征効力

上諭軍機大臣曰據扎拉豐阿奏稱達什達瓦部落人衆請移至扎卜堪安插等語前已降旨令伊等暫住巴里坤附近地方俟明年另籌游牧且達什達瓦屬人正擬選派出兵若將丁壯選派遷其妻孥於扎卜堪冬季行走勞頓即至彼處亦仍須籌辦養贍今據達什達瓦之妻告稱伊等屬人內可揀選兵丁八百名應即行選派遣赴軍營進兵人衆已有口糧不須另給其餘人等應如何賞給接



濟之處著於現運糧石及存貯茶斤內酌量辦理  
一面奏聞一面賞給達什達瓦屬人既可選派八  
百名而和起豆斌等但因前議派涼州莊浪兵四  
百名今既將此項兵丁所辦行裝給達什達瓦屬  
人以抵其數辦理亦屬拘泥應先派四百名起程  
嗣後或四百名或三百名俟馬匹到日再行續進  
至涼州莊浪兵丁不必遣往伊等到彼亦屬無益  
著即行遣回軍營正需馬匹之時不必辦給馬匹

酌給車價令其行走其薩喇爾之子玉魯斯兄喇  
嘛羅卜藏即著由歸化城送往察哈爾游牧完聚  
再所奏布庫努特九十餘戶如係策楞近日收服  
之衆應行分賞軍營効力官員若係歸順前來之  
人俟散秩大臣吞圖布到時令其酌量選派帶往  
軍營効力餘亦照達什達瓦屬人安插

己丑

侍衛第瑪等疏奏扎薩克三濟特等言語情形

第瑪等奏言准副都統富德咨遵

旨將班珠爾書信給和碩特扎薩克三濟特及台吉  
鄂齊爾等閱看并將三濟特等言語情形具奏  
臣等帶領三濟特等於十一月初九日至烏里  
雅蘇台即將班珠爾書信給三濟特鄂齊爾閱  
看據三濟特稟稱阿睦爾撒納負

恩叛逆無人不恨查額林哈畢爾噶係鄂齊爾之父  
諾爾布敦多卜游牧與沙克都爾曼濟游牧相

連如伊等游牧未動自可合力隨大兵前進我  
游牧亦在沙克都爾曼濟附近地方中雖隔綽  
和爾游牧其人甚少如與諾爾布敦多卜等一  
同進勦我族中台吉如瑪尼巴圖巴蘇泰瑪賚  
烏巴什努庫特圖魯孟克阿穆爾努斯海薩里  
等可通信協力其班珠爾所給衆台吉書信俟  
給與諾爾布敦多卜沙克都爾曼濟等看後再  
行曉示衆人等語據鄂齊爾稟稱我年幼即蒙

皇上格外天恩將來回見我父諾爾布敦多卜惟竭  
力共勦逆賊以期報効等語至班珠爾宰桑禪  
宗已照例給與口糧於十一月初十日馳赴軍  
營三濟特出痘將愈暫為安歇臣即帶領馳赴  
西路軍營奏入報

聞

庚寅

叅贊大臣達爾黨阿等疏奏勦滅包沁逃竄人

衆

達爾黨阿等奏言前據親王成衮扎布報稱路  
遇逃亡包沁業經擒殺數人聞烏隆古地方尚  
有此項人等現在帶兵前往等語嗣據副都統  
扎爾杭阿會同成衮扎布塔爾瑪善等領兵前  
往遣索倫護軍校布音達爾等於察罕郭勒地  
方追殺十餘人生擒一人又遣索倫護軍校達  
海等在青吉爾地方追殺厄魯特三人喀爾喀

副管旗章京扎木占至博羅鄂博地方追殺厄魯特七人十月二十日成袞扎布等親至烏隆古之扎克鄂博地方追及賊人三路堵截將肯哲顏達什巴雅爾圖薩喀及伊等妻孥盡行剿滅外計剿殺成丁男子三百餘人俘獲妻孥四百餘口烏鎗馬匹等項俱行收獲據巴雅爾圖等供稱阿睦爾撒納現已前往伊犁等語所有此次効力人員應請

旨交部議敘其戶口牲隻分賞官兵以示鼓勵奏入

報

聞

辛卯

命授二等侍衛奇徹布為頭等侍衛

上諭軍機大臣曰此次勦滅包沁叛衆二等侍衛奇

徹布甚屬奮勉著加恩授為頭等侍衛並賞銀一

百兩令其前往西路軍營効力



諭陝甘總督方觀承等查辦軍營馬匹

上諭軍機大臣曰據扎拉豐阿奏稱甘州肅州送到馬匹內腴瘦不堪乘騎仍行解回者甚多現在所收馬匹腴分亦不過四分等語此項送往馬匹俱係各營餵養備用何至疲瘦若此之多即堪用者亦不能肥壯甘州肅州離巴里坤甚近現已若此路遠更何以堪策楞領兵前進為時已久續進官兵刻不容緩乃馬匹竟不能應用此皆各營平日

不盡心餽養及解送人員怠忽所致著方觀承吳達善嚴查叅奏外仍將此項解回馬匹照數選擇補送其續解各處馬匹亦著作速送赴巴里坤應用毋得少有遲悞再解回馬匹若回至各原處必多倒斃或於安西等處地方就近餽養並著方觀承等酌量辦理

士辰

定西將軍策楞疏奏進兵所過情形

策楞奏言十一月初三日吐魯番之達爾漢伯克莽噶里克遣伊子自和卓前來軍營稟稱情願派兵効力但現在馬匹無多春間派兵一百五十名途間被布魯特等搶掠後達什達瓦人衆經過吐魯番復被搶奪請給與馬匹隨營効力並將自伊犁脫出之察哈爾兵伊羅勒圖送回軍營臣將伊羅勒圖安插臺站即遵

旨獎諭白和卓賞給緞疋又因軍營糧餉一時不能

送到並令白和卓照今年夏間之例將伊等游牧羊麵運送軍營貿易白和卓即回至游牧遵諭運到臣領兵至特訥格爾地方呼爾瑞台吉達瓦之弟鄂爾奇達遜帶領宰桑宗對等前來告稱我兄達瓦前往入

覲游牧無人阿巴噶斯等逼令搶掠臺站不得已順從而行後諾爾布林沁兵至我即隨同前來所有搶掠臺站時分給駱駝一百隻尚存七十餘

隻應行繳還臣亦曉諭慰撫並將駝隻分給臺  
站應用奏入報

聞

甲午

定邊左副將軍哈達哈等疏奏噶勒雜特得木  
齊丹畢率衆來降

哈達哈等奏言據沙喇布魯圖卡倫侍衛瑪賚  
文稱噶勒雜特得木齊丹畢率屬人一百十二

戶來降隨遣侍衛安崇阿前往查問據丹畢告  
稱係宰桑都噶爾屬人久欲投誠前為達瓦齊  
調遣後赴和托輝特郡王青滾雜卜處投誠今  
在彼處種地今行至摩和爾岱地方遇阿睦爾  
撒納前來搶掠我等逃避得出懇求遷移卡倫  
內居住等語查丹畢戶口共六百有餘各有牲  
隻器械臣即飭管旗章京德里克將伊等移至  
扎卜堪安插並令管轄扎哈沁之協理台吉策

凌旺舒克就近管轄奏入報

聞

乙未

叅贊大臣富德疏奏帶領噶爾藏多爾濟等沿途行走情形

富德奏言臣接奉

諭旨令臣於烏里雅蘇台派兵一千名護送噶爾藏多爾濟前往游牧臣即遵

二十  
二十  
旨曉諭噶爾藏多爾濟等伊等不勝感悅第臣等自  
烏里雅蘇台起程於十一月初九日已抵奈曼  
明安地方若更向調兵尚須守候時日前臣已  
奏准在奈曼明安地方豫備索倫兵三百名現  
已齊集計此地至巴里坤僅止七日之程由巴  
里坤至額林哈畢爾噶亦不過十餘日之程已  
與噶爾藏多爾濟等公同商酌即帶領索倫兵  
三百名前往沿途加意防護自可無虞大約十



二月初間即可抵伊等游牧俟到日臣即帶領  
兵隨將軍等進剿奏入報

聞

辦理青海事務副都統德爾素疏奏採買馬駝  
數目

德爾素奏言臣於十月二十二日接奉

諭旨令臣會同郡王索諾木丹津於各扎薩克採買  
馬駝解赴西路軍營臣即於十一月初一日出

口前赴博羅充克克地方採買馬二千匹駝四百隻於十一月二十五日委員解赴軍營奏入報

聞

丙申

命查審倒斃馬匹之遊擊鍾世俊等

上諭大學士曰據方觀承奏遊擊鍾世俊守備色爾敏接收軍營換回馬一千九百七十匹沿途並

不加意收放以至倒斃一千八百四十餘匹怠忽  
已極等語鍾世俊色爾敏俱著革職拏問治罪至  
軍營換回馬匹前據治大雄等奏明四千有零何  
以該弁等所領止一千九百餘匹是治大雄等從  
前並未查明實數冒昧具奏並著交部嚴加議處  
又

諭曰方觀承奏遊擊鍾世俊摺內據鍾世俊供稱  
此項馬匹係索倫察哈爾等兵丁自伊犁騎回又

經進接永常騎往克什圖往返疲乏等語該弁等收領馬匹如果不盡心收放以至倒斃如此之多自屬罪無可逭若實係回自伊犁又復騎往克什圖勞傷已極與有意怠玩者有間且其咎在責令收領之人而該弁等承委辦理勢非由已情尚可原著方觀承等將實在情由查核具奏候朕酌量降旨

丁酉

命叅贊大臣玉保速赴策楞軍營協辦軍務

上諭軍機大臣曰據策楞奏稱諾爾布林沁遣人告稱  
伊父噶爾藏多爾濟所遣宰桑車木布已抵游牧  
一切進兵事宜現候將軍扎拉豐阿叅贊大臣玉  
保等到時前來會商並未領兵來見等語諾爾布  
林沁尚未知策楞已授為將軍是以專候扎拉豐  
阿等到時商議朕前因策楞與永常觀望不前是  
以革職今策楞自知前譴奮勉効力仍復加恩錄

用著將此傳諭諾爾布林沁等令其聽候調遣至  
玉保原係在軍營行走之人稔知彼處事宜及厄  
魯特等情形著即馳赴軍營於一切事務悉心籌  
畫如有所見即與策楞商議斟酌辦理毋得稍存  
退諉倘各執意見或至阻撓事機自不能逃朕洞  
鑒

命傳

諭噶爾藏多爾濟聽候將軍策楞調遣

上諭軍機大臣曰前阿逆搶擄臺站時諾爾布林沁頗知大義擊敗阿巴噶斯哈丹等朕加恩封為郡王後又帶兵協助將軍勦滅布庫努特曾降旨嘉獎近又集聚屬下兵丁與將軍策楞約於烏魯木齊會合乃策楞使人督催諾爾布林沁伊遵照伊父所遣宰桑之言靜候將軍扎拉豐阿等到時始發兵來會前因策楞與永常辦理未善朕將伊革職治罪諾爾布林沁未知策楞復任將軍遲疑未

赴亦情理之常但策楞自帶兵進發奮勉行走諸  
事悉合機宜著富德傳旨曉諭噶爾藏多爾濟此  
時伊若已抵軍營一切調取兵馬商辦事務務協  
助策楞斟酌妥辦若尚未至軍營著即寄信與伊  
子諾爾布林沁聽候將軍策楞調遣不可稍涉觀  
望

諭定邊右副將軍扎拉豐阿速赴軍營

上諭軍機大臣曰據扎拉豐阿奏稱接奉授定邊右



副將軍之旨現在緩行候達爾黨阿交印後再行  
前進等語扎拉豐阿此奏殊屬錯謬策楞帶兵進  
發為時已久兵力亦復不多亟宜帶兵續進互相  
策應扎拉豐阿身荷重任宜即奮勇効力迅奏膚  
功乃稱候印緩行殊不識事理輕重達爾黨阿帶  
兵行走到期未可豫定著即傳諭扎拉豐阿馳赴  
策楞處協同辦理如策楞徑往伊犁扎拉豐阿仍  
遵前旨駐劄額林哈畢爾噶辦事

訓飭駐劄巴里坤辦事大臣和起豆斌等

上諭軍機大臣曰據策楞奏催和起豆斌等將應補給兵丁馬匹及甘州肅州續到馬匹即速解赴軍營現在尚未解到等語策楞帶兵進發全恃馬力和起豆斌理應上緊辦理凡解到巴里坤馬匹自宜隨到隨解俾策楞等不至有悞軍行今屢次咨催尚未解送和起等不過以策楞係得罪之人即不遵照辦理無甚關係策楞現辦理將軍事務

伊等何得不遵照辦理有意延緩著和起豆斌明白回奏

命封貝勒塞卜騰郡王品級協辦北路軍務

上諭軍機大臣曰據舒明奏稱貝勒塞卜騰遵旨帶二十餘人馳赴軍營等語塞卜騰自投誠以來龜免効力春間進兵頗著勞績今一聞朕旨即帶兵馳赴軍前急公任事誠可嘉予著賞給郡王品級若能更立殊勲朕當加以重賞現在擒拏叛賊俱

由西路進兵北路尚無所事惟今年收服之汗哈  
屯烏梁海等及陸續來降之輝特人衆其中尚不  
可全信應加防範著塞卜騰留心查察不必宣露  
再塞卜騰抵軍營後協同哈達哈等辦事並無馳  
驅之處其戶口俱著帶往居住所有陳奏事件准  
其列名在桑寨多爾濟成衮扎布之後雅爾哈善  
之前

定西將軍策楞疏奏偵探阿睦爾撒納情形

策楞奏言據卡倫佐領桑寨將自阿巴噶斯等  
游牧脫出之阿道海解到臣詢知係呼爾滿台  
吉巴顏屬人在奎屯喀拉烏蘇坐臺八月十七  
日為阿巴噶斯哈丹之得木齊吹津掠去今乘  
間逃回問其現在情形據稱聞阿睦爾撒納帶  
領戶口在博羅塔拉坐牀阿巴噶斯哈丹與呼  
爾滿三鄂拓克共帶兵二千並集賽兵一千額  
林沁巴特瑪車凌兵一千至額林哈畢爾噶等

處搶掠游牧十月二十三日會合於瑪納斯地方但我逃來時各游牧並未豫備明係詭言聲張不足為據又聞呼爾璦台吉納木奇欲投順前來為阿巴噶斯哈丹所拒不能渡瑪納斯河現在各居游牧等語又據阿敏道解到之都爾伯特屬人西特所供相同惟聞阿睦爾撒納有已逃往哈薩克之語臣思賊人詭言聲張俱不可信即當乘其不備速行進兵是以即留阿道

海等作為嚮導並行知諾爾布林沁令其會合  
同進奏入報

聞

命封輝特台吉達瑪林為扎薩克台吉

侍郎舒明奏言輝特台吉達瑪林帶領屬人六  
十餘戶來尋伊妻父都爾伯特汗策凌同居前  
經烏里雅蘇台辦事大臣奏明今應將伊屬人  
編入佐領同都爾伯特汗策凌同居游牧並請

加

恩封授職銜奏入

上諭軍機大臣曰都爾伯特汗策凌之婿台吉達瑪  
林率衆來歸著照所請歸於策凌游牧同居達瑪  
林著加恩封為扎薩克台吉加賞緞六疋並著舒  
明查明伊戶口內如須賞給口糧之處即奏聞賞  
給

戊戌



議撥綏遠城右衛馬匹

軍機大臣奏言現在西路進兵馬匹應多為豫備甘肅陝西解送巴里坤營驛缺額之馬雖議令購買足額恐一時不能應用現於山西省營驛馬內揀選二千五百匹解送肅州其綏遠城右衛滿洲官員兵丁實拴馬共七千八百餘匹請於此二處揀選馬數千匹解送備用甚為有益但此項馬匹徑解肅州途中仍恐疲乏如酌

量送至寧夏等處暫補營馬缺額收槽餵養由  
彼處解送肅州既不至馬腓疲乏而就近亦可  
調遣應交與將軍富昌加意揀選酌派官兵解  
送並移咨督臣黃廷桂指定地方派員接收其  
綏遠城右衛應補馬匹即將鶴山哈寧阿帶領  
撤回官兵馬一千七百匹全數充補仍將所欠  
之數陸續採買足額奏入

上從之

己亥

諭署陝甘總督方觀承等速運軍營糧餉

上諭軍機大臣曰軍營進剿官兵所需口糧甚關緊要其新到巴里坤之人亦需接濟現在運送遲滯不能應用著方觀承等速將應需各項現已辦齊者催趲前進此後亦著隨到隨運一面辦理一面將運赴之數奏聞

命駐劄巴里坤辦事大臣和起等安撫普爾普策楞

屬人

上諭軍機大臣曰據和起等奏自伊犁前來之喀爾喀台吉普爾普策楞屬人索隆達爾嘉等請回至原游牧居住等語從前將軍班第曾將普爾普策楞稟請回至原游牧居住之處奏聞經朕降旨俞允今索倫達爾嘉等即其屬人也此時普爾普策楞如親身投來著和起等即傳旨慰諭伊等原係喀爾喀部落久羈異域今欲思歸舊地情甚堪憫

著加恩授為扎薩克一等台吉管轄屬人准其歸  
於舊游牧地方會合親族同居但正值冬令嚴寒  
暫令住居巴里坤地方俟明年春草發生再行遷  
移至此等遠來之人自應接濟口糧和起等以現  
在巴里坤正辦理官兵糧餉不為接濟坐視其困  
設伊等因無口糧或致盜竊寧不滋生事端即巴  
里坤不能辦給現在哈密存貯米糧茶葉甚多相  
離不遠令伊等自備馬駝前往馱載未始不可和

起等全無籌畫惟一奏了事著飭行已傳諭方觀  
承等速將糧餉運赴巴里坤著和起等查明此等  
戶口今冬應須賞給口糧若干即遵旨辦理

諭定邊左副將軍哈達哈等

上諭軍機大臣曰據哈達哈等奏遣往哨探之蒙固  
勒岱遇宰桑都噶爾屬人多爾濟戶口現在帶回  
等語多爾濟等既係都噶爾屬人無庸內移或於  
扎哈沁游牧或另擇地方給與游牧居住仍向伊

等曉諭現在伊等宰桑哈薩克錫喇都噶爾等已  
加恩授為大臣効力軍前候擒獲逆賊時仍遣回  
原游牧居住伊等為包沁人搶掠著酌量賞賜茶  
葉或給予口糧以資接濟並行文策楞傳諭哈薩  
克錫喇都噶爾等知之再扎木禪帶兵往尋伊祖  
瑪木特未遇而回著哈達哈等遣人曉諭瑪木特  
之妻令其安心居住毋庸過慮瑪木特係準噶爾  
舊人熟悉地方情形必不至於圍困現在大兵進

發伊聞信自當迎出倘有不虞必以伊孫扎木禪承襲官爵從重加恩並令扎木禪小心奉侍善於寬慰哈達哈仍不時遣人往視給與食物以示體

卹

駐劄巴里坤辦事大臣和起等疏奏內大臣厄爾錐音等赴軍營日期

和起等奏言侍衛烏爾登帶領內大臣厄爾錐音哈薩克錫喇等於十一月十二日至巴里坤



即將伊等照例給與馬駝鹽菜等項并於原帶來之索倫兵三十名外添派兵二十名又據散秩大臣吞圖布懇請帶往効力之布庫努特兵二十名一併給與應得口糧於十一月十六日自巴里坤起程前赴軍營奏入報

聞

十二月庚子朔

恩加餽養撥解肅州馬四草豆折價銀兩

上諭軍機大臣曰據方觀承奏稱解到肅州挑存賧  
欠馬匹及撥補肅州鎮缺額馬匹急需飼餵充用  
惟所支草豆折價現在不敷採買請按馬借銀三  
兩分季扣還等語此項餵養馬匹係籌備軍需之  
用折價既屬不敷著即加恩賞給不必扣還但或  
因此而承餉之員轉思從中侵蝕貽誤軍需情罪  
尤不可恕著黃廷桂於到肅之日留心查核如有  
前弊即嚴叅治罪

辛丑

命侍郎兆惠駐劄巴里坤辦事

上諭軍機大臣曰此次大兵俱由西路進發巴里坤  
地方辦理馬匹口糧催督臺站及管轄達什達瓦  
等屬人並厄魯特新降人衆俱屬緊要今現在巴  
里坤辦事大員豆斌既係漢人和起亦未諳事此  
路現在無事著兆惠速赴西路毋庸帶領兵丁輕  
騎前往駐劄巴里坤辦事前命富德管理臺站現

駐額林哈畢爾噶地方僅能管理彼處其自巴里  
坤至額林哈畢爾噶臺站事務並交兆惠管理從  
前和起等不計事之緩急驟行驛遞經朕降旨申  
飭伊等接旨後并將應奏之事亦俱遲緩兆惠到  
日應斟酌事務分別辦理不得過於拘泥其北路  
臺站事務經富德兆惠等辦有成規著阿思哈接  
辦

壬寅

諭定西將軍策楞等進兵事宜

上諭軍機大臣曰策楞奏稱接奉諭旨現在暫停進  
兵俟後隊會合同進等語策楞所領兵丁無多馬  
力亦屬平常朕慮其輕進覽奏殊合機宜第北路  
大兵已降旨停其往赴西路惟令達爾黨阿帶兵  
千名前往策楞止應候噶爾藏多爾濟及厄爾錐  
音等到時會同進發若伊等已到仍不進兵則又未  
免太緩此時如領兵直抵伊犁固須慎重若僅勦

滅阿巴噶斯等原屬易辦設遲疑不進伊等得聞  
風逃避且恐阿逆別生詭計轉難辦理至諾爾布  
林沁等不即遵檄應付馬匹亦屬情理之常朕曾  
降旨令將疲瘦馬匹與伊等換易少增以茶葉銀  
兩伊等既得價值將所易馬匹善為收放即可肥  
壯自必樂於從事此際噶爾藏多爾濟等陸續將  
到策楞即照此辦理齊集兵丁馬匹先往阿巴噶  
斯哈丹等游牧勦殺所得別項牲畜物件不須過

為查察任伊等自取以示鼓勵惟馬駝必盡行收取接續兵力若辦理完竣乘勢可抵伊犁即行前進若阿逆已據伊犁則更從長計議籌出萬全方為妥協策楞係領兵將軍勦殺阿巴噶斯等尚不須親身前進著於扎拉豐阿玉保二人內派出一人率同台吉宰桑等鼓勇先行伊帶領大隊相機指示隨後進發至噶爾藏多爾濟等及厄爾錫音等荷朕厚恩遣往軍前効力策楞務虛衷商酌資

其謀議伊等如有所見自必誠心陳告遇陳奏事  
件俱著伊等列名俾得各抒所見爭思報効著詳  
悉傳諭策楞等知之

定西將軍策楞疏奏散秩大臣尼瑪至軍營日  
期

策楞奏言十一月十三日散秩大臣尼瑪來至  
軍營告稱

大皇帝施恩宥罪授為大臣令在軍前効力惟有竭



力奮勉以期報効等語臣即令其速往游牧豫  
備兵丁馬匹聽候一同進兵奏入報

聞

癸卯

侍衛端濟布疏奏噶爾藏多爾濟等籌辦進兵  
事宜

端濟布奏言臣於十一月二十日至巴里坤富  
德帶領噶爾藏多爾濟等亦至臣即將

恩賜噶爾藏多爾濟之子諾爾布林沁翎帽物件降  
旨宣諭伊感

恩叩謝並稱

天朝大兵自上年前進今已經撤回現在所有馬匹  
俱不能肥壯前往伊犁取道博羅布爾噶蘇闡  
勒奇二嶺此地雪大路狹衆兵不能齊進若俟  
明年正月二十內進兵似為有益此時遣人由  
朱爾都斯一路招降烏魯特克勒特等人衆並

遣使曉諭伊犁河之喇嘛等令其擒賊自効伊  
等自必遵行等語又據沙克都爾曼濟告稱現  
在進兵惟塔本集賽哈薩克邊界及附近烏梁  
海地方稍有可慮若令北路大兵同俟至明春  
約會前進更為妥協等語又據巴雅爾告稱大  
兵進伊犁道路甚窄現在水草不足又恐雪大  
難行不若先遣使曉諭額林沁令擒逆賊額林  
沁係我至戚斷不真心從賊自當遵示擒獻等

語奏入

上諭軍機大臣曰據端濟布奏稱噶爾藏多爾濟沙克都爾曼濟巴雅爾等公同商議請於明年正月進兵並寄信額林沁及招降伊犁衆喇嘛等令其擒賊自効伊等悉心籌畫實堪嘉予即照所請於明年正月內進兵但歲內必須將阿巴噶斯等勦滅不使伊等聞風逃竄昨已傳諭策楞著仍遵前旨辦理噶爾藏多爾濟議遣人曉諭宰桑錫克錫

爾格令其招降伊犁衆喇嘛等即著派侍衛一員  
同往衆喇嘛處傳諭錫克錫爾格既為噶爾藏多  
爾濟等素知信其非真心從賊自可寬宥以期後  
效至如圖布慎克什木敦多克曼集輩情罪可惡  
必當明正典刑以彰國法此番伊犁擾亂半由彼  
處喇嘛等從中助惡前曾降旨令將伊等盡行勦  
戮繼思蒙古人尊奉黃教且其中亦當示以區別  
先後諭旨甚明今觀噶爾藏多爾濟等令遣人招

降衆喇嘛其心事顯然可見策楞到彼應將喇嘛  
中起意倡亂之人即行正法其情罪稍有可原者  
量從寬典並商同噶爾藏多爾濟等分別妥辦今  
雖僉議於明年正月內進兵若已勦滅阿巴噶斯  
等游牧及收服烏魯特克勒特等時機會可乘勢  
不宜緩即當奮勇前進亦毋庸過於拘泥兵貴神  
速惟在相機辦理噶爾藏多爾濟等僕僕道途若  
已定於明年進兵伊等游牧甚近不必令其守候

軍營應暫行遣回俾得休息俟至期約赴同進並著策楞傳諭伊等知之

命賞給侍衛烏爾登副都統職銜授為領隊大臣

上諭軍機大臣曰此次烏爾登帶領厄魯特宰桑等前往軍營行走奮勉著加恩賞給副都統職銜在領隊大臣上行走現在進兵勦滅阿巴噶斯哈丹等游牧即著烏爾登領兵前往

命司員唐喀祿經理薩喇爾游牧

上諭軍機大臣曰薩喇爾現在軍營伊妻病故子尚幼小其自伊犁回來之子玉魯斯及同族人等尚在未到伊游牧內無人經理著派唐喀祿帶同筆帖式一員前往照看所有陸續賞賜物件及伊家產牲畜等項查明註冊俟薩喇爾回至游牧時一一明白交還毋得稍有遺漏以示體卹

定邊左副將軍哈達哈等疏奏籌辦運糧事宜  
哈達哈等奏言臣遵奉



諭旨領兵防守北路現派滿洲兵五百名察哈爾兵  
五百名駐劄烏里雅蘇台看守倉庫察哈爾兵  
二千餘名駐劄扎卜堪防範衆厄魯特等游牧  
其索倫喀爾喀和托輝特兵共七千餘名南自  
伊克斯淖爾北至烏哈爾和碩地方沿途安設  
卡倫駐劄於形勢要害之地此項兵丁內有自  
烏里雅蘇台支領錢糧三月者有未經支領者  
查布延圖科卜多距烏里雅蘇台一千五六百

里庫卜克爾齋拉罕距烏里雅蘇台一千里若  
令伊等自行領取往返馬力易疲若運至該處  
散給又需另行馱載派員解送現在周圍各卡  
倫除蒙古兵丁外計官兵一月需米一千餘石  
自今年十二月至明年三月需米五千餘石查  
直隸山西陸續解送米石尚未全到臣行文兆  
惠永貴等令其即用原運駝隻運至各駐劄處  
酌量加增運價較為簡便奏入報

聞

甲辰

命傳

諭烏魯特宰桑錫克錫爾格

上諭錫克錫爾格曰比年準夷不靖擾害羣生朕為

天下共主發兵拯救既定伊犁俾安衽席詎意阿睦爾撒納背恩叛逆煽惑衆部是用再申大討以昭國法爾與阿逆素非同謀且宿有仇隙在擾亂

之頃勢力不敵勉強服從已為朕所洞鑒近聞逆黨約蘇圖等知副將軍薩喇爾陷入爾部爭相索取爾並不遣送其非黨惡同謀於此益信爾誠能感戴朕恩擒獲阿睦爾撒納并助惡之約蘇圖敦多克曼集克什木等來獻軍門朕必加爾厚恩或力弱不能禦賊即帶領薩喇爾會同大兵前進奮勉自効

命內大臣厄爾錐音等由朱爾都斯進兵

上諭軍機大臣曰據內大臣厄爾錐音奏稱與達什達瓦之妻商議大兵由闐勒奇博羅布爾噶蘇進發伊請帶兵四五千名由朱爾都斯進發等語朕已降旨照伊所請將內地之兵仍由闐勒奇博羅布爾噶蘇進發即將從前選派達什達瓦兵一千名再派出索倫兵二千名噶爾藏多爾濟兵一千名由朱爾都斯進發著鄂實為領隊大臣會同厄爾錐音相機辦理厄爾錐音熟悉彼處情形一切

事宜鄂實俱悉心商議聽其指畫

平定準噶爾方略正編卷二十二

欽定四庫全書

平定準噶爾方略正編卷二十三

乾隆二十年冬十二月乙巳

命遣人曉諭明噶特游牧人衆

上諭軍機大臣曰從前班第等奏稱明噶特部落共二千餘戶數年以來屢被擄掠牲畜俱盡願自備資斧內移阿爾台地方居住因阿睦爾撒納阻止未行等語明噶特部衆現在何處伊等與阿睦爾

撒納有隙必無從逆之事著策楞訪明游牧地方  
遣人通信令伊等擒賊自獻或勦殺與賊同黨之  
鄂拓克等並令其隨大兵効力於事有益即商同  
噶爾藏多爾濟等令其派明白可信之人前往曉  
諭其有似此等部落之人俱一一遣人曉諭使足  
供我臂指則賊勢愈蹙大兵一到即可集事策楞  
等務宜悉心籌畫設法辦理勿專恃朕指示遵行  
以副委任



丙午

叅贊大臣玉保疏奏普爾普來告伊犁情形

玉保奏言臣於十一月十七日至阿察喀喇烏  
蘇地方拏獲自伊犁前來克勒特宰桑巴桑之  
弟普爾普據稱阿睦爾撒納領兵千餘名在博  
羅塔拉居住另給兵一千名令巴特瑪車凌額  
林沁等於十一月初間起程擄掠諾爾布林沁  
游牧伊犁大喇嘛及宰桑烏克圖錫克錫爾格

納延泰巴顏巴桑等皆言其負恩叛逆擾害地方議將阿睦爾撒納擒獻贖罪并送歸薩喇爾已於十月二十五日往聞勒奇嶺集兵遣我送信諾爾布林沁防備等語臣即將普爾普解策楞軍營令與諾爾布林沁詳加詢問奏入

上諭軍機大臣曰據玉保奏稱所獲普爾普告知伊犁喇嘛等現在集兵擒獻阿逆以贖前罪等語準噶爾人等原屬反覆無常然尚知利害從前阿睦

爾撒納詭言四衛喇特人衆皆其羽翼衆人不審  
虛實懼伊勢力脅從作亂後知諾爾布林沁出兵  
擊賊而北路發兵先遮賊人游牧不獲逃竄復勦  
滅包沁人等西路又將布庫弩牧等誅戮伊等聞  
風畏懼旋即知悔令伊犁喇嘛等知逆賊力不可  
恃共圖擒獻以贖前罪此非出於飾說乘此機會  
策楞等即應領兵直入責令伊等擒賊自効誅滅  
黨惡寬其脅從其勢更易且噶爾藏多爾濟等皆

係該處大台吉其舊日屬人自必聞風來歸可以  
資其兵力若普爾普所稱阿逆派兵千名遣巴特  
瑪車凌等擄掠諾爾布林沁之語尚非實情不過  
伊等欲聯絡諾爾布林沁之意如果前來則大兵  
以逸待勞會同諾爾布林沁奮勇勦滅賊勢從此  
益孤更可計日就獲現在降旨傳諭伊犁喇嘛等  
令其効力贖罪著加恩授普爾普為三等侍衛賞  
銀五十兩並派侍衛一員同伊前往伊犁宣旨曉

諭

命傳

諭伊犁喇嘛等効力贖罪

上諭伊犁喇嘛等曰阿睦爾撒納負恩叛逆擾亂伊犁爾等畏其勢力勉強服從朕早已洞見情形昨聞宰桑錫克錫爾格不將副將軍薩喇爾遣送逆黨約蘇圖等具見誠悃已傳旨曉諭令爾等自知前非俱欲擒賊自効遣普爾普告知將軍大臣等

據實陳奏實堪嘉予爾等果能洗心滌慮冀受朕恩即將逆賊擒送軍前不特寬宥爾等從前罪愆自當更加厚恩慎勿執迷不悟自取誅滅

命免革巴里坤辦事大臣和起豆斌職

上諭軍機大臣曰和起豆斌因從前辦理馬匹遲悞經部議革職仍留軍營効力行走本應如所議革職第念和起等此次辦理軍營糧餉馬匹尚屬無悞著免其革職從寬留任伊等邀恩寬宥宜益加

意辦理倘再有貽誤斷不寬貸

丁未

定西將軍策楞疏奏會同諾爾布林沁進兵事宜

策楞奏言臣會同諾爾布林沁令其派兵二千名於十一月初一日在特訥格爾華托羅海等處會齊進剿阿巴噶斯哈丹等游牧後因諾爾布林沁未能如期而至改於十一月二十日會

合又因特訥格爾等處水草不足約至阿察地方會同進發現在帶兵前進奏入

上諭軍機大臣曰據策楞奏稱在阿察地方會同諾爾布林沁進勦阿巴噶斯哈丹等及招服塔本集賽各事宜等語策楞等現在進兵甚合機宜惟從前因伊犁來人等告知喇嘛宰桑等圍困將軍大臣降旨令將喇嘛等勦滅今伊犁喇嘛同宰桑烏克圖錫克錫爾格等請擒賊贖罪遣普爾普告知



是其情尚可原策楞抵伊犁時著將喇嘛等寬宥以安衆心並責令其擒賊自効再約蘇圖尚在幼年未必有從賊之心不過聽察哈什指使察哈什斷不可容其餘如約蘇圖等尚可寬貸者著策楞等分別辦理

戊申

命曉諭中外西陲用兵始末

上諭大學士曰阿睦爾撒納本一奸詭狡惡之人因

數年來準噶爾部落篡奪相尋希圖吞噬而準噶爾台吉乃綽羅斯世傳伊係輝特勢不能遽行竊踞遂以達瓦齊為奇貨誘助攻殺伊得從中取事及達瓦齊既為台吉不遂所欲乃率衆來降彼時策楞舒赫德議留其丁壯於軍營而老幼婦女悉於歸化城安置朕為天下共主彼以窮蹙來歸而轉令妻子離散實所不忍且伊擁衆數千戶同來亦斷不肯聽其離析勢必肆出剽掠其為害於

喀爾喀者甚大是以治策楞舒赫德之罪而召見  
阿睦爾撒納於熱河行在錫之封賞伊即面陳平  
定準噶爾方略準噶爾一事乃我

皇祖

皇考屢申撻伐未竟之緒本所當辦今既機有可乘自  
不容已而以夷攻夷非即用伊為先導不可是以  
即用為將軍然朕已早燭其未可深信故令額駙  
色布騰巴爾珠爾與之同行密降諭旨阿睦爾撒

納若實心出力可與之事權以誠感之若有反叛之狀則汝收將軍印便宜行事伊既向化而來朕即開誠布公實心相待加以厚恩伊亦人類寧不知感此

上蒼所鑒臨初非術馭之利結之逆詐而豫圖之也迨伊犁既定朕降旨封四衛喇特為四汗伊遂潛懷逆謀欲併準噶爾遣人至哈薩克揚言伊領兵平定伊犁而不云天朝大兵又托言哈薩克人衆謂

非令伊為總台吉不可私調兵數千置將軍印不用用準噶爾台吉私印植黨修怨殘殺自恣六月班第等具以奏聞朕即降旨令其即軍中拏問治罪班第等旋奏伊將遵旨入覲朕召軍機大臣示以所奏機宜皆謂阿睦爾撒納自必前來瞻仰或慮其回巢後滋生事端耳而朕即豫料其必不前來是以復令班第等即於彼中相機從事若已起身在旬日內亦當追回迅速拏問蓋伊既懷叵測

即詐稱入覲亦必於途次遷延若不早為完結必  
致生變與其俟伊交結煽動變遲而費大何如及  
時乘機辦理之為得也乃班第等奏稱已遵旨遣  
人追取適有哈薩克使者同行恐其驚疑復將追  
取之人撤回獨不思哈薩克自大兵平定伊犁屢  
次遣使至營本極恭順且深悉阿睦爾撒納之反  
覆狡詐果正其罪亦何妨明切曉諭示以天討彼  
何驚疑之有此班第等未能遵旨辦理自失機宜

之大端也朕見班第等不能在外完結即料其至  
伊游牧地方必且竄匿必且潛取家屬因降旨烏  
里雅蘇台軍營大臣令於撤回滿洲索倫兵內截  
留一千名往禦而阿睦爾撒納果密使人邀其妻  
子克期奔會幸其所使班珠爾後期而我滿洲索  
倫兵已詰朝畢集遮留其妻子部衆無一人闌出  
者班珠爾等伎倆既窮始束身入覲仍計同時刻  
之以去此朕於熱河親訊時據班珠爾等一一供

吐者若朕不豫為部署彼之家屬人衆安然遠颺  
豈不增其羽翼耶額林沁多爾濟我之扎薩克親  
王班第等以其老成可任令與阿睦爾撒納同行  
乃齊木庫爾既密告其弟逆謀已著速當擒戮而  
恬不知警但答以我單親王彼雙親王不敢便宜  
從事夫既為國家叛賊尚何雙親王之足論及阿  
睦爾撒納繳授將軍印信令伊先行尚不覺悟逾  
日乃知其遁去始以兵追捕而已無及矣此又自



失機宜之一大端也班第鄂容安薩喇爾駐劄伊犁受心膂之寄當聯為一體乃班第為人過於謹慎氣局狹小好親細事鄂容安雖尚知大體而不能通蒙古語一應機密籌畫未能洞悉頗有漢人習氣至薩喇爾之在準噶爾譬之內地王府長史護衛者流耳今雖授以顯秩彼衆原所不服而伊復粗率自大三人者性習各殊安望其能和衷共濟重以阿睦爾撒納之奸其所不悅盡遣入朝三

臣之左右皆其黨與三臣深信不疑疎於自衛兵散處馬遠牧而軍營金帛茶布以備賞賚者夷衆耿耿以視班第等初不介意即如敦多克曼集乃阿睦爾撒納所信用班第等一聞搶掠臺站之信即應立為擒戮以剪其爪牙乃轉令傳諭喇嘛安撫夷衆敦多克曼集因得召集羣凶操戈相向三臣倉卒衝突賊衆大集勢不能支班第鄂容安捐軀以殉薩喇爾被執令班第鄂容安見機明決早

為之計安得至此此二臣之殞命種種皆由自悞  
無所歸咎而朕用人失當之悞亦無可辭也所可  
異者阿睦爾撒納之狂悖情形色布騰巴爾珠爾  
在軍營時皆所深悉且曾受朕密旨防範者乃毫  
不加察反為所愚與班第等如水火朕是以命其  
來京乃在朕前仍無一言奏及伊親為額駙位列  
藩王豈其與逆豎同謀實可信其必無特年少無  
知初不料其至此也至永常以領兵大臣駐守烏

魯木齊聞臺站被掠初以為窮夷自相攻劫奏請  
帶兵追逐意尚近於勇往即加內大臣銜以示鼓  
勵及聞阿睦爾撒納逃叛較畏憚乖張甘心僨事  
退回巴里坤而置伊犁於度外設令永常當葉克  
明安宰桑扎木蘇等叩轅請告之時厲兵迅往諸  
部得所依倚協力搜捕阿睦爾撒納了身遁軼可  
計日就擒西陲已早安帖無事如北路之殲滅包  
沁是其明驗也若以為臺站已斷難於前進則現

在策楞與噶爾藏多爾濟之子諾爾布林沁又何  
以能偏師深入振我軍威而伊犁之喇嘛宰桑等  
皆聞風內嚮悔懼自新願率衆追捕叛逆以贖前  
愆耶策楞既能奮勉以蓋前愆爰授以定西將軍  
而永常之罪不容誅今雖死於道路亦當明正典  
刑總之此事諸臣昧於機宜節節貽悞然其中蓋  
有

天意何則朕思阿睦爾撒納雖傾險反側但當伊犁甫

定衆或以其為國宣勞而一切罪狀惟軍營大臣見之朕及軍機大臣知之天下後世不盡知之也又設使其遵旨入覲朕為久遠計本欲宣播其奸挈問治罪然無知者猶將有烏盡弓藏之議是今日之逆跡彰露使人人知其必不可不誅未必非上蒼之默啟之也人情樂於觀成難與謀始上年定議用兵舉朝率多疑議及伊犁平定則以為事出意外聞阿睦爾撒納負恩逃叛又以為究不可辦且

以為此固當然今聞伊犁宰桑悔罪擒賊或又以  
為恐未必然人心風俗一何怯懦至此此朕所以  
愧且懼也班第鄂容安見危授命固為可憫然於  
事無補迥非傅清拉布敦之殞身西藏為國除凶  
者可同年而語然一死已足自贖班第誠勇公爵  
仍著加恩令伊子巴祿承襲鄂容安襄勤伯爵著  
該旗帶領伊子引見令其承襲朕於軍國重務一  
本大公隨機順應順者嘉與之逆者誅討之奮勇

者獎勵之怯懦者罰強之惟準乎事理之當初非窮兵勤遠亦不至耗財重費合計現在軍需較之雍正年間所費不及六之一而偏災賑卹與夫中外賞賚初未因軍興稍有裁損此王公大臣等所共知者彼妄生異議者誠何心耶將此事顛末並在事諸臣功罪宣諭中外知之

臣等謹案西陲用兵始末我

皇上淵衷默運上審



天時中權人事旁灼物情莫不

哲炳先幾

神周獨斷是以

規畫所及微特衆人不能窺尋萬一即身司其事如

軍營大臣日賴

廟謨指授其間克副稟承者固無不功立効隨捷於

影響設當機領悟稍遲未獲投時赴會已不

免毫釐千里之失此皆成蹟瞭然可指而數

至<sub>臣</sub>等昕夕

禁廷跪聆

密勿每值羽郵進

御仰荷

訓示精詳並奉

溫旨垂詢參核<sub>臣</sub>等輒或扞格一時未即會心竊要

逮乎事機顯著乃知

聖明一一早為照燭如操左券如數前籌實無由上

測

高深也詩曰先民有言詢于芻蕘又曰如彼築室于道謀是用不潰于成蓋

聖人於輿情日用之恒無一事不

虛公博採以資集益若

國家軍行至計所在則自古以為非常之原芸芸者流徂方隅未見豈易與言發謀慮始故築室之戒持之不得不堅其義政與先民所稱交

引互發於此益信我

皇上建從來未有之

膚功先擅從來未有之

睿算又豈方策中韜鈴智略所可少參擬議者哉

諭定西將軍策楞安撫伊犁事宜

上諭軍機大臣曰春間曾降諭旨平定伊犁後將四

衛喇特及各鄂拓克人衆編為旗分佐領其宰桑

即都統職銜得木齊即佐領職銜收楞額即驍騎

校職銜與準噶爾舊銜無異原屬易於遵行但此時尚可毋庸辦理現在進兵凡投誠之台吉宰桑等著策楞即速奏聞朕當酌量賞以品級職銜俟明年來京入覲再行封授準噶爾人等不知約束易生疑惑策楞至伊犁後諸凡條例務須簡易明白便於遵行不必似內地之詳密使伊等手足無措方為妥協至貢賦一項準噶爾連年不靖近又遭阿睦爾撒納滋擾疲弊已極今年貢賦著加恩

寬免自明年為始減伊等原納貢賦之半徵收此  
項仍為賞給彼處衆人俸祿及養贍喇嘛之用著  
策楞詳細曉諭伊等知悉辦理大局已定其餘事  
務暫留玉保厄爾錫音等在彼辦理策楞著帶尼  
瑪哈薩克錫喇吞圖布恩克博羅特等三人同  
至京師詳細籌畫再行辦理其伊犁從前原議駐  
兵五百名今亦毋庸增添仍照舊數派索倫兵五  
百名駐劄惟兵丁馬匹須在一處如蒙古游牧人

等庶可以資防守其議遣濟隆胡土克圖前往伊犁之處宜詳察彼處喇嘛等情形再行遣往著策楞訪問厄爾錐音等具奏此等事宜雖尚可緩亦須豫為籌及策楞等務期于事有益隨宜妥酌辦理

定邊左副將軍哈達哈等疏奏防範烏梁海事宜

哈達哈等奏言臣等奉到

諭旨令會同青滾雜卜商酌防範收服烏梁海事宜  
適青滾雜卜來至布延圖軍營臣與之商議據  
青滾雜卜告稱新收汗哈屯烏梁海等愚蠢無  
知經阿睦爾撒納遣人唆誘不可不留心防範  
已令郭勒卓輝等由烏梁海得木齊內選派數  
員帶兵駐劄哈道里等處瞭望遇事即行傳報  
其額爾齊斯地方有郭勒卓輝屬人博博等一  
百戶尤屬可疑且去宰桑處甚遠難於約束並



諭令郭勒卓輝將伊等內移以防逃竄所有新  
收烏梁海等現在俱行加意防範奉入報

聞

庚戌

諭山西巡撫恒文採辦商駝

上諭軍機大臣曰據明德奏稱西路軍營駝隻現在

陝甘二省採辦尚未充裕晉省歸化城朔平一帶

商販駝隻甚多請勅下該撫採辦等語著傳諭恒

文在該省商販駝隻內採辦一二千沿邊解送肅  
州聽用

辛亥

議安插噶爾丹達爾扎等

軍機大臣奏言臣等詢問台吉噶爾丹達爾扎  
濟克濟扎卜等舊住青海因羅卜藏丹津謀叛  
移住喀爾喀後為茂海策凌等逼勒同逃準噶  
爾地方大兵平定伊犁經將軍班第等查明給

與戶口交與侍衛瑪琿帶領入

覲中途為呼爾璜台吉達瓦屬下搶掠令將軍策楞  
進兵達瓦屬人仍將伊等送回應請

旨發回喀爾喀游牧居住奏入

上從之

定西將軍策楞等疏奏遣人曉諭伊犁喇嘛等  
各事宜

策楞等奏言臣等將普爾普所告伊犁喇嘛宰

桑等擒賊自効情形詢之諾爾布林沁諾海奇  
齊克等俱云此係實在情形並無可疑宰桑烏  
克圖人甚明白係噶爾丹策零時舊人伊犁擾  
亂時並未附和從賊此次遣人前來告知亦必  
出伊定見等語臣即令諾爾布林沁等寄信各  
喇嘛宰桑知悉現在大兵進發額林哈畢爾噶  
各台吉宰桑等俱派兵隨行擒勦逆賊伊等果  
能擒賊來獻自當奏聞加恩若所信不實即用

兵勦滅遣得木齊德訥克同策卜登前往曉諭  
並將

皇上軫念將軍及曉諭準噶爾部衆各

諭旨齎往宣示又據普爾普告稱現在額林哈畢爾  
噶一路不便行走須由烏魯木齊取道吐魯番  
從朱爾都斯前進方為妥協照伊所請前往  
臣並將奉到

諭旨會同諾爾布林沁等剋期勦滅阿巴已噶斯等

游牧事宜與諾爾布林沁等商議據稱前因伊  
父遣人告知靜候將軍大臣等到時商議是以  
未即派兵同來今現擬將附近之布魯古特呼  
爾璊各處兵丁先派一千餘名於十二月初五  
日齊抵軍營俟其到時臣即於初七日領兵前  
進奏入報

聞

定邊左副將軍哈達哈等疏奏換易烏梁海馬

匹事宜

哈達哈等奏言臣等遵奉

諭旨與青滾雜卜及察達克等商議換易烏梁海馬  
匹事宜據察達克告稱新收烏梁海等約可換  
馬一千匹但馱載物件往彼換易路程較遠請  
將茶煙緞匹等項運至吹地方彼處離汗哈屯  
游牧甚近臣即派察達克等前往辦理計換馬  
一匹給與物件運價約銀七兩五錢其舊厄魯

特貝子明楚克公丹拜及青滾雜卜所屬烏梁  
海等亦可購馬一千匹請每匹給與價銀七兩  
五錢即交青滾雜卜派人辦理再從前禁止烏  
梁海等在卡倫附近交易恐其滋生事端令伊  
等感激

天恩誠心歸順請嗣後每年或一次或二次令蒙古  
商人等馱運物件換易伊等牲畜即在叻地方  
交易似于彼此有益奏入報



聞

癸丑

命賞給都爾伯特游牧人等籽種糧石

上諭軍機大臣曰舒明奏稱都爾伯特汗策凌等告  
知伊屬人等生計稍艱請將游牧移至額克阿喇  
勒等語伊犁平定後原議定伊等遷至舊游牧額  
爾濟斯地方居住若額克阿喇勒則附近卡倫遷  
往居住事屬可行著照所請即於今歲遷往彼處

游牧俟擒獲阿逆後仍令伊等遷至額爾齊斯路  
更近便倘有派伊等兵丁之處即由彼派往諸事  
易於辦理等凌等既稱在推河地方生計稍艱著  
賞給籽種六百石交與恒文等運至額克阿喇勒  
地方務於明年三月內運到使伊等得以及時耕  
種毋致遲悞又據納穆扎爾奏稱輝特和碩特人  
等現將牲畜在塞楞額鄂爾昆等處換易籽種等  
語輝特和碩特人等今歲自軍營回來又向塔米

爾扎卜堪往返遷移牲隻疲瘦不必令其換易亦  
著納穆扎爾查明應需籽種若干石行文恆文處  
支領賞給以示體卹至策凌等從前騎馱前往軍  
營之馬駝現在應行交納但念伊等往返軍營牲  
隻不無疲瘦著寬限二年陸續交納

叅贊大臣富德疏奏噶爾藏多爾濟等赴軍營  
日期

富德奏言臣帶領噶爾藏多爾濟等至巴里坤

遵

旨換給伊等馬駝并賞給台吉宰桑等緞匹及兵丁  
銀兩伊等感激奮勉議定於十一月二十四日  
自巴里坤起程前赴軍營旋據巴雅爾告稱自  
巴里坤第三臺度集地方離伊游牧甚近擬先  
往備兵且與和通鄂勤商議寄信額林沁令其  
擒獻阿睦爾撒納即令伊等前行又於十一日  
三十日接到策楞咨稱普爾普來告伊犁衆喇

嘛宰桑等情願擒賊自効情形臣即曉諭各台  
吉宰桑伊等更覺踴躍據噶爾藏多爾濟告稱  
現在已到伊所屬扎哈沁地方既有此信應即  
先往游牧整齊兵馬速行進剿等語亦照伊所  
請派營總巴雅爾等同伊前往臣亦帶領官兵  
尅期前進奏入報

聞

乙卯

恩賞布庫努特等口糧

上諭軍機大臣曰據和起等奏稱派出隨同吞圖布進兵之布庫努特兵二十名現照達什達瓦屬人之例賞給口糧馬匹等語前據吞圖布稱伊布庫努特人衆共九十餘戶酌量可選兵七八十名今僅用二十人殊屬太少著再選派六十名令其帶領前往此項布庫努特等九十餘戶早經投順從前永常未經奏聞是以未及施恩除揀派兵丁給

與馬匹口糧外其餘人等俱著照達什達氏屬人之例一體賞給口糧以示優卹

命定西將軍策楞確勘錫克錫爾格擒賊自効情形上諭軍機大臣曰詢問侍衛滿楚知錫克錫爾格將薩喇爾羅留加之因辱情形甚屬可惡昨據策楞等奏稱伊犁喇嘛及錫克錫爾格等情願擒賊自効曾降旨宥伊等罪愆現在大兵進發伊等果擒獻首惡悔罪輸誠尚屬可恕若因力不能支始將

阿逆獻出希冀邀恩則非出於本心應仍將錫克  
錫爾格罕解來京治罪

綽羅斯台吉達什達瓦妻車臣默爾根哈屯遣  
宰桑鄂齊爾入

覲

命授鄂齊爾為散秩大臣賞銀五十兩衣一襲

丙辰

駐劄巴里坤辦事大臣和起等疏奏副將軍薩



喇爾遣人報知伊犁情形

和起等奏言十二月初五日副將軍薩喇爾遣  
伊兄布林及察哈爾藍翎侍衛那木查爾等帶  
領和碩特台吉諾爾布敦多克來使鄂爾奇木  
濟烏魯特來使鄂斯庫綽和爾來使韋諾克克  
勒特來使齊木伯爾和碩特台吉圖們來使烏  
特巴拉等五人至巴里坤告稱八月二十四日  
宰桑克什木敦多克曼集等作亂薩喇爾及布

林那木查爾和通鄂勤等衝陣力戰至二十六  
日夜為宰桑錫克錫爾格所執看守六十日後  
準噶爾台吉宰桑喇嘛等感慕

天朝威德自知罪愆共怨恨阿睦爾撒納反覆叛亂  
商同擒賊自効現聞阿睦爾撒納同台吉額林  
沁舍楞在博羅塔拉道都托羅海地方居住各  
領兵前往擒拏薩喇爾同公丹拜藍翎侍衛和  
通鄂勤宰桑約蘇圖錫克錫爾格巴桑等帶兵

三千餘名在博羅布爾噶蘇進發台吉諾爾布  
貝奇宰桑烏克圖等帶兵三千餘名在閭勒奇  
嶺進發於十一月初九日在托和木圖會集俟  
擒獲時交薩喇爾解送因各遣使人齎準噶爾  
喇嘛等奏書前來並請入覲

天顏等語臣即將布林等及來使五人派員馳送京  
師伊等並稱由吐魯番一路前來是以行文北  
路將軍大臣一體豫備奏入

上諭軍機大臣曰和起等奏薩喇爾同準噶爾台吉  
宰桑等議擒阿睦爾撒納來獻等語薩喇爾駐劄  
伊犁倉猝遇賊班第鄂容安捐軀盡節伊為賊拘  
留自必愧恨然因兵少力弱中賊詭計非伊無能  
被執令伊感念重恩會同伊犁衆台吉宰桑等分  
路領兵期獻逆賊是其誠心奮勉終始不渝朕聞  
之實深嘉予轉復為之惻然著策楞傳旨慰勞並  
將荷包鼻烟壺各一件俟薩喇爾至軍營時即行

頒賜其宰桑烏克圖等原係歸誠之人曾降旨給  
與職銜止因阿逆從中煽惑伊等勉強服從今既  
悔罪輸誠擒賊自効俟拏獲阿逆後將伊等悉行  
寬宥並當從重施恩發往荷包鼻烟壺各十五件  
將現在効力之宰桑等遍行賞賜策楞等詳悉曉  
諭伊等知之又

諭曰薩喇爾原係厄魯特之人叩關投誠甫及五年  
隨圍出兵奔走幾無寧歲前此命其同駐伊犁亦

因伊熟彼地情形耳及阿逆背叛生變班第鄂容  
安捐軀盡節而薩喇爾衝陣突出其後力窮被執  
拘留所以不加深咎者誠以厄魯特風俗原不知  
致身大義未可以世受國恩之滿漢臣子相提並  
論初非朕之溺愛厄魯特而然也拘方之士或將  
謂三人同駐伊犁彼二臣臨危致命而伊乃覲顏  
就執其偷生負國斷難姑容如此則是以祖父世  
臣受恩深重明於大義者為此未免過於求全責

備而其視薩喇爾為過高矣夫責人易而當局難  
平居議論誰則不能獨不思身當其境可深信其  
能引決就義如班第鄂容安之為者恐亦未能多  
得也俟阿逆擒獲之日朕自分別功罪另降諭旨  
恐無知之人但有所聞輒生異議並未深悉事理  
一味隨聲附和澆風陋習不可不亟為挽回特曉  
諭知之

丁巳

命定西將軍策楞等查辦伊犁陷賊人員

上諭軍機大臣曰阿逆背叛時侍衛官員隨將軍等駐劄伊犁有陣亡及自盡者著策楞抵伊犁後查明請旨加恩其未能死節被賊羈留者雖俱不能無罪但因留兵不多倉猝被難非昔年和通呼爾哈淖爾臨陣被執者可比有自行投到及查出者俱著從寬免其治罪遣回京師

命封和碩特台吉諾爾布敦多克公爵



上諭軍機大臣曰和碩特台吉諾爾布敦多克奏稱  
伊父羅卜藏車凌從前久欲投誠因在噶爾丹策  
零時未獲率衆前來今年進兵班珠爾又將伊屬  
下人等占據等語頃諾爾布敦多克之子鄂齊爾  
赴熱河入覲加恩封賞令同噶爾藏多爾濟等赴  
軍前効力令諾爾布敦多克會同薩喇爾領兵擒  
拏阿睦爾撒納誠悃可嘉著施恩封諾爾布敦多  
克為公所有班珠爾占據伊舊日屬人著策楞即

行查明給還

戊午

諭定西將軍策楞進勦博羅塔拉事宜

上諭軍機大臣曰據策楞奏稱此時前往伊犁尚非  
急務大兵進發即向博羅塔拉迎赴薩喇爾擒拏  
阿逆並將助惡人衆悉行勦滅等語所奏甚合機  
宜惟辦理助惡人等尚當示以區別如阿巴噶斯  
哈丹察滾德濟特敦多克曼集等固屬罪無可逭

若巴特瑪車凌額林沁二人甫從哈薩克前來且  
額林沁素與阿逆積有讐隙或能協力擒拏更當  
格外寬宥至宰桑約蘇圖年幼無知不過為賊所  
誘前曾降旨令將厄爾錫音哈薩克錫喇尼瑪約  
蘇圖俱授為圖什墨勒內大臣令約蘇圖已協同  
薩喇爾前往擒拏逆賊著策楞傳旨補授其巴  
特瑪車凌等亦著策楞到日詳察情形奏聞請旨  
命定西將軍策楞查辦達什敦多卜

上諭軍機大臣曰據哈達哈奏稱都噶爾屬人敦多克告稱阿睦爾撒納遣宰桑色克色烏勒木齊等將達什敦多卜游牧遷去伊獨逃出來歸等語達什敦多卜係獲罪被擒之人未經治罪授伊為侍衛又賞給副都統職銜遣往軍前効力如遇阿睦爾撒納以兵力威逼不得已而脅從尚屬可恕若僅遣人傳喚即行明係有心從賊即應重治其罪著策楞至伊犁查明確實伊果遷移他處隨同阿

逆行事著即將達什敦多卜拏解京師正法

命齊木庫爾之子策布登多爾濟襲封郡王

上諭軍機大臣曰齊木庫爾自歸誠以來感戴朕恩  
實心効力豫將阿逆謀叛情形告知軍營大臣並  
率領輝特人衆內附誠悃可嘉是以施恩封為郡  
王今聞溘逝深堪憫惻著賞銀一千兩料理喪事  
並加恩將伊子策卜登多爾濟承襲郡王兼管輝  
特盟長事務伊年幼不能獨辦著授普爾普為副

盟長協同管轄又

諭侍郎納穆扎爾曰齊木庫爾病故伊子策卜登多爾濟年幼恐不能約束衆人而其部落自普爾普外亦更無人可用是以授策卜登多爾濟為盟長即以普爾普為副協同辦事但普爾普不可深信若有妄行之處當示以節制著納穆扎爾加意防範又不可少露形跡使其生疑

癸亥

命獎賞貝勒車木楚克扎布等

上諭軍機大臣曰據策楞奏稱現今玉保車木楚克  
扎布阿敏道等帶領兵丁一千一百名前進其餘  
弁兵策楞等隨後繼進於初七日起程其厄魯特  
台吉惟唐古特諾海奇齊克等數人前來餘皆未  
到等語今伊犁台吉宰桑等俱欲擒賊自効事機  
順應大兵自宜速進策楞等不俟厄魯特等兵到  
自行進發甚合機宜看來不必藉厄魯特兵力即

可勦滅阿巴噶斯等助惡人衆惟在策楞等加意  
奮勉迅奏膚功至貝勒車木楚克扎布自去歲即  
在軍前効力近又同勦布庫努特頗著勞績公旺  
布多爾濟隨伊父軍營行走始終不懈今並在哨  
探隊內行走實屬奮勉可嘉著加恩賞給車木楚  
克扎布三眼翎旺布多爾濟孔雀翎以示鼓勵  
諭駐劄巴里坤辦事大臣和起等

上諭軍機大臣曰據和起等奏稱從前自伊犁前來



之喇嘛達木巴達爾扎跟役薩喇那奔一戶現在  
逃竄等語此數人雖已逃竄尚屬無關緊要但駐  
劄巴里坤之厄魯特等甚衆達什達瓦屬人亦不  
下數千豈可轉相效尤任意逃竄此項人等係安  
插在卡倫之內抑或在卡倫之外如在卡倫內則  
何以無人覺察任其脫逃即在卡倫以外亦應有  
防範之人著和起等查明奏聞再前曾降旨令公  
納噶查等帶領達什達瓦屬人及額敏和卓回人

前往阿克蘇城嗣又降旨停止此項回人業經賞給製裝銀兩此際應已抵巴里坤若即令撤回徒勞往返現派達什達瓦人等隨營効力巴里坤所有馬匹如可辦給回人乘騎即令伊等一同馳赴軍營接續大兵亦屬有益著和起等酌量辦理並傳諭策楞知之

甲子

命各省提鎮稽察臺站

上諭軍機大臣曰軍營文報關係緊要從前特派大員督察以專責成今據黃廷桂奏稽察臺站不若責成沿邊提鎮等語沿邊臺站多屬營弁馳送責成提鎮稽查實為妥便著照所請派沿邊各提鎮不時往來查察勿致稍有玩悞其直隸山西亦著各提鎮就近督察

命籌辦買補馬匹事宜

上諭軍機大臣曰據黃廷桂奏稱西安滿營等摘缺

馬匹在歸化城購買山西綏遠城右衛撥馬三千  
匹亦陸續買補一時同購必致難於採買等語現  
在西路用兵陝甘調缺營馬亟須購補著照大學  
士黃廷桂所奏先儘西安滿營各處應需馬數速  
為買足其綏遠城右衛應補馬匹不必同時購買

乙丑

諭定西將軍策楞安置唐古忒事宜

上諭軍機大臣曰據策楞奏唐古忒告稱哈薩克錫

喇遷至哈卜塔克拜塔克等處居住意似觀望又  
準噶爾人衆俱有望諾爾布林沁為台吉之意似  
皆唐古忒捏飾之詞已經明白開導並曉諭哈薩  
克錫哈等語唐古忒如此陳告特因伊係阿睦爾  
撒納族人今在額林哈畢爾噶居住衆皆不悅伊  
欲藉此傾軋即如從前恩克博羅特亦謂唐古忒  
全無踴躍從征之意不若將伊游牧附近馬匹姓  
隻全行收取盡將其丁壯攜至軍營使伊不得妄

有異志等語曾告之扎拉豐阿看來明係伊等互相猜疑彼此告訐之詞全不足為據試思噶爾藏多爾濟荷朕深恩哈薩克錫喇乃係阿逆仇人必無從賊之事策楞以噶爾藏多爾濟哈薩克錫喇必無異志曉諭唐古忒並將此情節行知哈薩克錫喇甚合機宜現在唐古忒隨同進兵著留心查察事竣後若仍將唐古忒安置額林哈畢爾噶殊屬未便並著策楞存記俟彼時另指一地方安插

唐古忒游牧

命傳諭噶爾藏多爾濟

上諭軍機大臣曰據扎拉豐阿奏稱噶爾藏多爾濟之子諾爾布林沁於十二月初七日病故等語諾爾布林沁年幼而甚奮勇前緣伊父入覲獨駐游牧頗著勤勞是以加恩封為郡王今聞病故深堪憫惻著賞銀一千兩用示優卹並傳諭噶爾藏多爾濟不必過於傷心此時若尚未同策楞帶兵前

進暫令在游牧休息俟料理伊子事畢再行續進

平定準噶爾方略正編卷二十三